

摘藻堂四庫全書薈要

史部

欽定四庫全書薈要

史部

硃批諭旨卷二百十一下

詳校官編修  
臣繆晉

欽定四庫全書舊要卷八千一百九十一

史部

硃批諭旨卷二百十一下

硃批程元章奏摺

浙江總督臣程元章謹

奏為奏

聞事竊查浙省從前有截留漕米四十萬石以備賑糶  
支銷之後開捐買補除派發各縣分貯外其餘二  
十萬石陸續易穀積貯省城永濟倉向交寧紹嘉



松兩分司經營後因米穀在廩年久不無折耗於  
雍正五年間經前督臣李衛議令收米之時每石  
加收四升五合以備折耗在案詎寧紹分司徐有  
緯於上年推陞離任查明伊經營項下缺少米七  
千四百餘石又穀六千五百餘石除將預收備耗  
米穀抵補外實少米五千八百九十餘石穀三千  
三百四十餘石又雍正九年撥運江南淮北米石  
內掬出氣花廩底等項米五千四百餘石除鹽商

捐銀二千五百兩抵補外尚少米三千石此項已  
經署督臣李燦准於鹽道庫內動支鹽務餘銀三  
千兩現交署分司汪德馨買補其餘所少米穀徐  
有緯指稱年例應銷名色希冀將別項公銀代伊  
補墊又因前督臣李衛摺

奏節省鹽商公費銀兩動用款項內附有撥補永濟  
倉折耗及氣花蓋頭等項米穀一語遂欲於此項  
節省商費內代為彌補臣到任後據司道議詳請

以鹽務餘銀撥抵臣查李衛送到摺稿現稱永濟倉折耗一項於節省十三萬兩內撥補臣以倉糧關係重大不便虛懸是以照虧空倉穀一面糾叅一面買補之例批令乘此秋收速行買補仍一面具摺奏請

聖裁定奪其如細查鹽道庫貯李衛所

奏節省銀十三萬餘兩或先已撥用或現在工程待支或別項借用或尚欠在商未經捐繳未有餘剩

在庫是銀米兩懸徒為紙上空談臣思倉儲米穀

倘有缺少霉爛俱應著落經營之員賠補定例昭

然各省遵奉今徐有緯缺少米穀已將在倉備耗

及商捐並鹽務餘銀共撥抵過米穀一萬餘石合

之所稱應耗之數已屬浮多此外復有缺少明係

虧空豈容又以年例應銷為詞重開折耗况鹽務

盈餘雖非正項但業已節省歸公止可於公務支

用豈可以盈千累萬之公銀代不肖之員彌補虧

空耶臣荷蒙

高厚殊恩惟知謹守繩墨不敢掩飾扶同除將徐有緯

照例

題叅請

旨究追外合將從前已經准銷撥補折耗緣由具摺陳

奏伏乞

皇上睿鑒謹

奏

叅劾徐有緯甚是至於鹽道庫貯節省之項曾經李衛摺請動用辦理數處工程朕記憶未清汝其一面確查一面咨詢李衛可也內如彌補徐有緯虧空不應之濫用難言其無若云李衛於中染指料係必無之事總之查詢後自然水落石出此奏朕嘉是覽之

浙江總督臣程元章謹

奏為奏

聞事竊照浙省烏程歸安桐鄉石門四縣於九月間偶

被冰雹其受災田畝艱於辦漕臣先經具摺奏懇  
天恩准予緩徵在案又查今歲夏秋之交各府田畝間  
生小蟲傷害田禾得雨之後漸次消弭但蟲少傷  
輕及早先得雨之處收成不過畧減惟嘉屬之平  
湖海鹽湖屬之武康紹屬之諸暨等縣境內有一  
二處被蟲較重又湖屬之安吉州蟲患雖輕因天  
目山發水灌注低窪田畝間有淹浸以上除諸暨  
一縣不徵漕糧外其餘四州縣被傷之田闔縣通

計原不成災而被蟲之戶催令完漕未免難於辦理統計四州縣被蟲田畝應納漕糧僅三四千石為數無多似不必與被雹之田槩請緩徵臣再四思維酌令各州縣借動倉穀碾米應兌俟來歲早穀登場時遵照上年蟲傷一案所奉

恩旨每漕米一石折徵銀一兩責令該州縣照數買穀還倉如此則一轉移間被蟲貧民既免催呼漕糧重大亦無遲誤而徵銀買補倉儲仍不致有虛懸

矣至於各府被蟲之田先經署撫臣王國棟等飭將備公銀兩酌量賞給助其補種菜豆臣抵任後復行令查明實在乏食貧民按戶酌恤是以小民不致失所咸頌

皇恩歡聲遍野惟是通省各州縣有捐監補漕及本年平糶各穀俱應買補今歲收成歉薄米價不能平減若再責令購買足數誠恐市價昂貴小民艱於謀食今近水各縣皆赴外省糴運其距水遙遠之

地暫緩至來歲早收買補價銀俱令解貯府庫以  
杜虧空之弊臣謹將見在辦理緣由據實

奏明伏乞

皇上睿鑒謹

奏

辦理甚屬妥協

浙江總督臣程元章謹

奏為欽奉

上諭事本年八月三十日大學士奉

上諭因黃巖鎮臣吳進義陳奏練習兵丁頭頂夾銀一

摺奉

旨吳進義識見庸愚有忝總戎之職傳

旨申飭并令將

諭旨與臣同提臣萬際瑞看欽此隨據鎮臣吳進義齎

捧到臣臣跪讀之下仰見我

皇上明竝日月無微不照伏思訓練三軍原有經常不

易之正道似此頭頂夾銀腹皮搪箭實係無賴之人游戲欺人之舉豈可以此教演兵丁為此無益之事

聖明訓飭至周且悉其噴筒一項臣已察看以鐵為之

比竹堅實但配船是否適用提臣萬際瑞明於水

師俟其驗明會商定奪至鎮臣吳進義前任杭協

時臣為浙江藩司同城一載見其應對奔走尚屬伶俐而誠實不足且素好奢華恐其操守亦不可

信若嚴加鈐束猶可黽勉任事臣惟有時時勉勵  
加意督率以觀後效所有臣欽奉

上諭緣由理合恭摺

奏覆伏乞

皇上睿鑒謹

奏

覽奏知道了吳進義當加意策勵之

浙江總督臣程元章謹

奏為欽奉

上諭事竊臣接准大學士鄂爾泰張廷玉字寄內開雍正十年十一月十四日奉

上諭江浙地方地廣人稠其中秀頑不一難保無姦邪匪類造作浮言煽惑人心冀生事端者從前尹繼善李衛俱留心稽查以防其漸今魏廷珍程元章接辦總督事務仍當留心稽察不可疎忽此事雖似在吏治官方之外然較官方吏治更為關係緊要該督撫

所當設法密察先事預防者倘目前疎縱將來發覺  
時朕必於魏廷珍程元章是問再者江浙營伍海防  
向來廢弛年來尹繼善李衛俱留心整頓著魏廷珍  
程元章加意訓練毋令懈惰爾等可傳旨密諭之欽  
此遵

旨寄信前來等因到臣伏查江浙地方為四通八達之  
地五方雜處之區人煙稠密秀頑不齊間有遊手  
好閒之徒造作謠言互相傳述或圖哄騙財物或

冀煽惑人心誠如

知有此種匪類加意密察朕復何慮

聖諭所當設法密察先事預防者臣敬謹銘心時時體

乃係

職分應行毋以爲多事苛求也訪不敢疎忽至於整頓營伍稽查海防尤關緊要

臣於抵任之初先經移行提鎮將弁勤加操練臣

不時調考以驗優劣遍加訪查以稽勤惰并通飭

文武嚴察口岸上緊巡防務使軍伍整齊山海寧

謐今蒙

聖恩訓諭臣惟有益加整飭時刻訓練盡職守以仰報

武備關係國家盛衰於斯勉之又勉方不負朕倚任之殊恩斷不敢少有懈弛致厯

宸衷也謹將恭接

聖諭緣由先行覆

奏伏乞

皇上睿鑒謹

奏

二事俱為至要之政當時刻留心毋忽

浙江總督臣程元章謹

奏為奏

聞事本年正月內據臣兩標中軍雷逢春呼麟稟送直隸總督臣李衛發來諭帖內云近聞湖上旗民雜還放馬蹂躪民間田地踐蹋勝景塗抹神像攀折果木令其派撥弁兵稽察查究旗人解送將軍棍交給兩縣并稱新督院公務忙甚不必請示而後行等語伏查督臣李衛於雍正九年十一月離浙臣於十年九月抵任因叩謁

聖祖仁皇帝龍位及往天竺寺稽察工程不時由西湖來  
往見各處廟宇景亭俱極整肅潔淨竝無旗民踐  
踏田地勝景及塗抹神像攀折果木等事不知李  
衛從何有此風聞且竝未咨會到臣而關係拏究  
旗民之事直諭兩中軍不必向臣請示似以浙江  
中軍惟聽命於直隸總督而浙江總督竟不得過  
問與聞於

朝廷體統未免有悖臣細思李衛辦理地方事務可以

效法之處亦多其性情高亢舉動任意則係習慣  
性成臣惟謹遵平日所奉和衷辦事不可尚氣之  
諭旨學其所長略其所短總以

國家公務為重斷不敢因其越俎欺凌遂存芥蒂彼  
此牴牾以致上厪

聖懷但因李衛發來此諭已經通省共知臣何敢復為  
隱匿謹具摺密

奏伏乞

皇上睿鑒謹

奏

李衛之粗率狂縱人所共知者何必介意朕取其操守  
廉潔勇敢任事以挽回瞻顧因循視國政如膜外之類  
風耳除此他無足稱朕歷來用人每多隨材器使不拘  
定格惟以有益於事及人地相宜為準而已如果自信  
得及一切盡屬不妨但涉擬議迎合揣度預防則邈若  
河漢矣誌之勉之

浙江總督臣程元章謹

奏為欽奉

上諭據實覆奏事竊臣接准大學士臣鄂爾泰張廷玉  
字寄內開雍正十一年二月初五日奉

上諭六年程元章赴浙時曾奏稱嘉湖所屬有一二縣  
遭被冰雹田穀歉收請將漕糧寬至癸丑年完納等  
語冬間奏摺來亦祇略言地方蟲傷薄收之情形竝  
未詳陳一切朕意以為蟲災尚輕該督等自己料理

妥帖矣今聞浙省上年被蟲之州縣甚多其中有收成大歉者今春米價甚昂乏食貧民嗷嗷待哺竟有公行搶奪之事此語似非虛傳不知程元章何以未曾詳奏爾等可即寄信詢問令其留心訪察倘果閭閻窘乏餬口艱難即當多發倉糧減價平糶貧苦之民設法賑濟一面辦理一面奏聞毋得回護前非負朕倚任欽此遵

旨寄信前來等因到

臣臣

跪讀之下不勝悚惕伏查浙

省上年夏秋之交各屬田禾間生小蟲雖多寡不

等處處皆有前署撫

臣

王國棟給油灑救又旋得

大雨隨即陸續消弭禾苗依然秀發是以委員會

同地方官查勘俱出有不致成災印結在案迨收

獲之時穀穗不綻米粒細小收成未免歉薄其中

惟嘉屬之平湖海鹽湖屬之武康安吉紹屬之諸

暨等州縣為最甚又嘉屬之石門桐鄉湖屬之烏

程歸安於九月初九日被電損傷禾稻

臣

於抵任

後卽具摺先後

奏明請將應徵漕糧分別帶徵及動倉穀碾米應兌并酌動備公銀兩按戶賑給已蒙

聖恩俞允轉行欽遵惟是浙省米糧卽豐熟之年向藉江楚等處客販接濟九十兩年連遇蟲傷業已民鮮蓋藏附近之江南江西二省米價亦不甚平客販無多市價漸昂貧民謀食維艱臣訪知情形卽通行各屬將存倉穀石於上冬十二月及今年正

月即行設廠減糶以濟民食至原奏傷重之海鹽  
平湖諸暨及台屬之黃巖等縣則於備公銀兩賑  
恤之外臣復率同司道府各員捐發銀兩并撥運  
省倉米穀動支鹽務涵耗或設廠煮粥或按口給  
米并另委員前往監賑臣又慮應糶地方現存倉  
穀或有不敷復經

題明借支鹽務公費銀五萬兩委員赴價平地方購  
買米穀運回接濟此浙省上年歉收及臣辦理之

實在情形也細加查核原止歉收米貴竝非旱潦  
成災顆粒無收者比惟是浙省民貧性猾稍遇歉  
薄卽冀蠲免錢糧通行賑濟不遂所欲卽造言生  
事如台屬之黃巖與寧屬之鄞縣現今米價較平  
於浙西而一二姦民竟敢藉米貴為由向殷實之  
家用強勒借米穀確查其人竝非實在饑民已將  
為首者嚴拏重處其風始息臣在地方固不敢忽  
視民瘼上負我

皇上保民如赤之盛心又何敢張大其詞以沽名釣譽  
今蒙

諭旨諄切仰見

皇恩浩蕩惠養黎元有加無已臣敢不悉心籌畫宣布  
皇仁通飭各屬再行確查分別輕重緩急應糶者多設  
廠所使遠近得沾應賑者卽發銀米如有不敷詳  
請續發按口實給麥熟停止務使正實貧民不致  
失所亦不使姦猾之徒乘機影冒臣斷不敢因循

回護貽誤地方致厯

聖懷也謹此據實覆

奏伏乞

皇上睿鑒謹

奏

覽奏始備悉情形朕懷深慰料卿非辜負擢用之人也

浙江總督臣程元章謹

奏為奏

聞事竊照本年三月初三日夜風雨驟至雷聲震作逾時始息臣恐春花豆麥或有傷損隨飛飭各屬確查去後旋據杭屬之海寧縣嘉屬之石門桐鄉二縣湖屬之安吉州烏程歸安德清長興武康等縣陸續稟報初三日夜雷雨交作帶有冰雹在田春花豆麥并新發蠶桑間有被雹打傷等情查各州縣所報情形有一鄉一村偶被微傷者有被傷偏重地方稍寬者其中輕重不一內惟石門桐鄉烏

程歸安四縣先於上年九月被雹傷禾目今菜花  
豆麥蠶桑等項正在長發復遭冰雹民情倍覺拮  
据臣據報當卽檄行布政使王紘委員星往被雹  
各州縣會同該地方官逐一履畝查勘被災輕重  
分晰詳報一面酌動款項速行按戶給賑務使災  
黎不致失所容俟查明詳覆到日另行

題報外所有海寧等九州縣被雹情形合先繕摺奏  
聞謹

奏

杭嘉湖等府所屬九州縣冰雹情形知道了加意撫恤  
毋忽

浙江總督臣程元章謹

奏為恭報年歲豐稔情形仰慰

聖懷事竊查浙省上年偶被蟲侵兼有數州縣被雹被  
水收成歉薄經臣節次

奏明荷蒙

聖恩軫念民依將應完漕米漕項及雍正九年以前舊欠錢糧分別帶徵并動支備公銀兩按戶給賑閭閻小民不至失所而尤望今歲春花成熟以資接濟乃自三月來仰邀

聖主福庇雨暘時若菜豆二麥處處豐收而杭嘉湖三府屬所有蠶絲均有十分收成麥收之後即得時雨早禾俱已插種齊全五月初一初二等日又獲甘霖大沛四野霑足晚禾現在遍插凡屬小民無

不餬口有資安居樂業交相慶幸感戴

皇仁除飭催布政司將各府實在收成分數查明彙報  
另行具

奏外所有年歲豐稔雨水調勻情形合先繕摺奏

聞仰慰

聖懷謹

奏

覽麥熟蠶收雨水調勻情形朕不為浙省憂念矣

浙江總督臣程元章謹

奏為奏

聞事竊照浙屬台州一府地當濱海田少山多上年偶被蟲傷收成歉薄米糧減少今春夏之交正直魚汛魚船雲集皆就台買食本地倉穀減價發糶恐有不敷而江楚採買之米又慮轉運維艱臣再四思維查接壤之閩省地方上年收成豐稔米價尚平若委員并招商赴閩購買由海運回以資接濟

猶易為力隨咨商閩省去後旋准福建督撫臣咨  
稱閩省所產之米只敷本地民食且商人販運未  
免稽遲酌議於廈門存貯臺穀內動撥二萬石就  
閩委員運台交明地方官發糶如有不敷再委員  
赴閩撥運等因臣卽一面移覆閩省撥運一面飛  
檄台州府遵照俟閩穀運到速卽盤收酌派各縣  
領回糶賣今前項穀石現在陸續運至但計到台  
之日各屬二麥已經收穫十分豐稔民食有資倘

不須平糶臣卽飭令分撥各縣存貯以實儲備將  
各縣上年及今春平糶未曾買補穀價解閩還項  
倘或價脚稍有不敷臣當酌量於公項內撥給以  
符閩省原價所有動撥鄰省倉穀酌款歸補緣由  
理合繕摺

奏明伏乞

皇上睿鑒謹

奏

因時制宜如此料理是

浙江總督臣程元章謹

奏為恭報雨水情形事竊查浙省各屬今歲春花俱  
十分收成四五兩月雨水亦甚調勻早晚二禾皆  
獲及時插種惟自六月以後雨澤愆期高田未免  
乾燥臣先於省城寺觀及續往嘉興掣鹽隨處俱  
建壇祈禱併飭凡缺雨地方一體舉行務求甘霖  
大沛以保有秋茲於六月二十日以後陸續據各

屬申報先後得雨日期及已未霑足各等由前來

臣查杭州嘉興湖州三府屬據報屢次得雨分寸  
約略相同雖未十分霑足禾苗尚皆暢茂寧波府  
屬據報鄞縣奉化象山等縣得雨霑足其餘早稻  
漸次收割晚禾亦甚秀發紹興府屬山陰會稽蕭  
山餘姚諸暨上虞等縣相繼俱報得雨雖未十分  
霑足要皆可望有秋早稻俱已成熟晚禾亦皆青  
茂台州金華二府屬報雨水霑足者多早稻皆已

收成惟蘭谿縣據報缺雨禾苗尚無妨礙衢州府屬西安龍游常山開化等縣俱報得雨霑足早稻成熟者多惟江山縣有無得雨尚未報到嚴州府屬遂安縣得雨霑足餘縣尚在缺雨惟壽昌縣現在蟲孽萌動已飭作速設法撲除不致為患溫州處州二府屬俱報得雨早稻收割將完晚禾亦甚暢茂至通省尚在雨水未足之處臣飭令虔誠祈禱務求甘霖普遍俟續報得雨齊全另同早稻收

成分數恭摺

奏明外所有現在雨水情形謹繕摺奏

聞謹

奏

覽雨水不足情形朕深為廕念汝自督浙以來屢著種  
種災異莅政臨民必有不合

天心處亟當返躬內省勉圖遷改

上蒼斷無枉施之理若仍執迷不悟自以為是馴致大不

是矣

浙江總督臣程元章謹

奏為據情代奏仰祈

睿鑒事竊照外任旗員子弟年十八歲以上者奉

旨悉令歸旗至伊等子弟中有可以助其父兄辦理事務者准奏聞請旨而道府等官不能自達者督撫代奏等因欽此臣接准部咨隨即通行各屬欽遵在案茲據糧儲道朱倫瀚呈稱切倫瀚係正紅旗漢軍

有親子候選州同朱孝先現年三十四歲例應歸旗但倫瀚管理通省漕運事務繁多須得親子代為照料庶免貽誤實有不能相離等情又據杭州府知府秦炘呈稱切炘係鑲黃旗漢軍出守杭郡緣省城地處繁劇兼查海塘工程必得親信子弟相為照料所有親弟秦焯請留任所協助辦理以免跋前疐後等情各循例呈請代

奏前來臣查糧道杭府均屬緊要事務殷繁助理需

人仰懇

聖慈俯准朱倫瀚之子朱孝先秦炘之弟秦焯各留伊  
等父兄任所協助辦理俾收臂指之力則感戴  
天恩於靡涯矣理合恭摺代

奏伏乞

睿鑒批示遵行謹

奏

朱孝先秦焯准留伊等父兄之任咨明各該旗知之

浙江總督臣程元章謹

奏為奏

聞事竊查溫州鎮標瑞安水師營派撥弁兵駕船出洋  
巡哨至六月二十八日早潮忽遇颶風浪湧一時  
躲避不及候至晚潮仍不能進港只得在洋拋泊  
不期本夜風勢更猛千總楊元坐駕五號戰船旋  
纒俱斷衝礁擊碎淹斃兵丁三名功加林逢春坐  
駕九號戰船旋斷漂流不知去處又玉環守備邱

宗義坐駕八號戰船會哨到洋遇風是夜一同拋  
泊亦被風擊碎淹斃兵丁十餘名據署溫鎮黃有  
才瑞安副將魏國泰玉環營叅將顧元亮各稟報  
前來臣卽飛檄飭行查明被淹兵丁確數加意撫  
恤及九號人船下落併沉失礮械槓槓等項仍飭  
作速設法撈獲容俟查明另行

題報外所有戰船遭風兵丁被淹情由臣謹繕摺奏  
聞謹

奏

此皆六七年來未聞之事朕實代汝畏之

浙江總督臣程元章謹

奏為奏請折留漕米以裕民食事竊查杭嘉湖三府屬地方地窄人稠民間多以育蠶為業田地大半植桑歲產米穀除辦漕外卽豐收之年尚不敷民食向藉外江商販接濟上年偶被蟲水歉收民情拮据荷蒙

聖恩將歉收田畝應完漕米分年帶徵發帑賑恤小民  
賴以得所近今江廣等省米價亦昂商販稀少是  
以杭嘉湖三府米價至今尚未平減且今歲夏秋  
之交雨澤未勻杭屬之新城湖屬之歸安烏程等  
縣高阜山田間有被旱之處續雖得雨但節序已  
逾似難望其結實臣業將情形具疏

題報并飭委員確勘在案其是否成災尚須勘明方  
定而收成終不免歉薄明春青黃不接之際誠恐

米價更昂現在安程二邑應完漕糧卽此細碎之米亦難上納事關

天庾民食臣身任地方不敢不預為籌畫伏查省城永濟倉存貯米穀除從前運往江北山東散賑尚未議補其餘又撥給乍浦滿營水師兵糧及湊放海塘夫役工食所存無幾鹽義倉穀石除湊撥江北山東協賑及上年賑濟松江各場被水竈戶併發場員易買竈鹽已無存貯各屬存倉穀石上年平

糴未補以及本年平糴為數既多恐一時驟難補足近准部咨御史翁藻條奏每年於秋成前視年歲之豐歉酌動庫銀往江廣等省產米之地買米運貯平糴誠為先事綢繆之計臣已飭布政司酌動銀兩委員採買但江廣各省現在米價亦昂加之水脚等費成本既貴將來平糴不能多減價值恐屬無益臣再四思維細加體察杭嘉二府屬晚稻尚獲豐收仰懇

聖恩俯准各截留本色漕米五萬石以備來春酌撥糶  
濟民食湖屬之安程二縣既屬歉收本年應完漕  
米一十八萬餘石并應帶徵雍正十年漕米七千  
六百餘石應請一併改折徵收解部以紓民力則  
三府羣黎均沐

皇仁於無既矣如蒙

聖恩俞允其折收米價可否照雍正九年

恩旨嘉興所屬漕糧每石折徵銀一兩抑或照雍正五

年部定每石折徵一兩二錢之例出自

皇上天恩臣未敢擅便謹具摺陳

奏伏候

諭旨欽導謹

奏

有旨諭部矣

浙江總督臣程元章謹

奏為奏

聞事竊照前任湖協副將范宗堯經直隸督臣李衛以  
驕縱狂悖抗違怠玩叅

奏奉

旨革職令往北路軍營效力欽此臣接准部咨隨照例  
委員摘印著令來省將所叅各款一一示知給咨  
令其作速赴京在案臣查范宗堯自恃清操貧而  
有傲骨凡

欽差往來從不出境遠迎謁見上司禮數間有不周臣

前任藩司卽知其為人上年

臣奉

命總督浙江宗堯因調考來省

臣

以其平素性傲面加

訓飭彼亦俯首愧服竝非不可教之人查湖協每

年向有鹽商餽送規禮銀四百餘兩宗堯到任數

年以來澹泊自甘即將此項留存營中以為周恤

兵丁之用竝未絲毫入已其於營伍事務亦肯留

心整頓卸事後止僕從三四人囊無長物同城之

府縣共助銀一百兩甫得起身臨行時各兵情深

愛戴結綵相送

臣

面詢湖州府知府唐紹祖委丈

湖所田畝之候補通判傅栴異口同聲言之確鑿

臣

按督臣李衛所叅各款皆係從前舊事

臣未能

盡知但據其操守辦事愛恤兵丁非無一長可錄之處臣既有所知不敢不據實奏

聞伏乞

皇上睿鑒謹

奏

范宗堯係朕深知之人其操守更所稔悉原素有身家  
非貧宦也據奏行李蕭條之狀殊屬瞽論

浙江總督臣程元章謹

奏為微臣戀

主情殷恭請

陞見以伸愚悃事竊臣謏陋凡材仰沐

皇上特達知遇之恩由翰林院編修

特簡福建學政數年之間不次超擢洊陞安慶巡撫受

恩深重方慚涓埃未報乃於上年七月復奉

恩命畀以浙江總督重寄伏念浙省幅員遼濶事務紛  
繁以一人而兼督撫鹽三任詰戎講武簿書期會  
緝私疏引黽勉莫逮兼之海塘關係甚鉅尤須加  
意辦理臣雖殫竭心力不敢稍懈而才短識淺彌  
深覆餗之懼臣到任後緣上年浙屬偶被蟲傷收  
成歉薄亟須整理撫綏今春又蒙

皇上軫念海疆

特命內大臣海望等赴浙會同查勘海塘動帑興修是  
以未敢冒昧陳

奏今舊塘附土培築高濶催趲已竣而土備塘工程  
約在秋杪亦可報完且今歲春花蠶絲俱獲豐收  
六月以來正在望雨之候各屬又陸續報獲甘霖  
者多地方頗覺寧謐一切政務亦稍就緒正臣子  
瞻仰

天顏之日跪懇

聖慈俯准將浙江督撫鹽三任事務

命員暫署客臣保護海塘八月大汛後謹於九月中束  
裝赴京恭請

聖安跪聆

睿謨指示訓誨俾臣得敬謹遵循矢竭駑駘力圖報效  
庶緊要封疆不致辦理錯誤則頂戴

皇恩於生生世世矣謹

奏

陛見之請且可不必既云才識短淺幅員遼濶綜理紛繁又云一切政務已稍就緒何期年之間奏效如是之速耶果能殫竭心力整理地方俾有起色勝如僕僕往返多矣勉為之

浙江總督臣程元章謹

奏為奏

聞事竊查浙江海關自歸巡撫衙門帶管以來因距省稍遠向委道府護理而沿海各口即係管關之員

派撥書役家人巡查照則監收除正稅外各口所得飯錢俱作三股均分在口書役及管關家人各得一股餘剩一股呈送臣衙門以為家人衣服之費每年約計收銀二千五六百兩不等歷任相沿已非一日伏思臣荷

聖恩畀以封疆重寄又蒙

賞給養廉以資用度設有不敷自當據實

奏請斷不敢因循舊例輒於關稅之內絲毫有所染

指惟查此項銀兩原係商人量給書役飯費出於  
情願若一旦革除則在口書役家人飯食無資勢  
必另立名色於中巧取不無病商如竟發還該關  
又徒為胥役人等中飽於事無益所以臣到浙後  
查有前署撫臣王國棟交存飯費銀八百兩當即  
分發海鹽平湖諸暨三縣為湊給賑濟之資臣任  
內又陸續解到二千三百兩俱飭發臣標中軍收  
貯以為拯恤地方偏災及緊要事務差委員弁盤

費賞給救火出力兵丁等項之用并飭造冊報臣衙門核查備案庶事不紛更而於公務有裨所有臣酌留海關飯費存充公用緣由理合繕摺

奏明伏乞

皇上睿鑒謹

奏

海關飯費固屬應留但類斯瑣屑之舉只可隨宜辦理不必諄諄留意蓋天下事未有務近小而不遺遠大之

理

浙江總督臣程元章大理寺卿臣汪滢原任內閣

學士兼禮部侍郎臣張坦麟謹

奏為奏

聞事竊惟海塘關係重大荷蒙

皇上睿慮周詳

允內大臣海望等所奏鳩工興築臣等遵照原議先將  
一萬四千餘丈之舊塘背後附土加培高濶并興

築土備塘一道緣浙省五月內梅雨連旬六月以  
來又值肩水灌田兩工竝舉人夫無多加培舊塘  
附土催趲將竣其備塘工程現有四分約在秋杪  
可能報完茲六月二十日臣程元章在嘉所掣驗  
引鹽見東南風甚大晝夜不息惟恐塘工或有坍  
埝專差標員星往工所嚴督各員加意防護復於  
二十二日親往海寧會同臣汪滢臣張坦麟沿塘  
查視因二十日晚潮洶湧浪高丈餘風激未退二

十一日早潮又至風勢更烈潮水撲上塘面以致  
草石舊塘間段坍卸矮塌者約有一千餘丈仰賴  
聖謨宏遠智燭機先舊塘附土加高培濶擁護於後潮  
水不能溢過塘身近塘居民廬舍田疇俱無傷損  
臣等督同文武員弁多方雇覓人夫協力搶修所  
喜二十二日以後潮汛漸小人力易施正在督率  
修築間據東塘兵丁報稱二十四日午後潮平風  
靜之時附近尖山地方係上年坍卸塊石塘現改

築大條石塘忽然蟄陷三十六丈等情臣等隨即  
星馳查勘見塘前漲沙連塘後民地坍塌成環月勢  
形幸民地尚高尺餘不致為患當即測量蟄陷之  
處水深二丈有餘勢難搶修遂飛調工員人夫連  
夜於塘後身搶築灣月土塘以資捍禦所有坍塌  
各段詳細丈尺容臣程元章另行具  
題外伏念塘工緊要時虞

聖懷謹先會同臣汪漑臣張坦麟恭摺奏

聞謹

奏

朕實代汝憂之朕之憂懷未知汝亦體諒否也

浙江總督臣程元章謹

奏為陳奏事竊照兩浙商人行運引鹽每年夏冬兩  
掣向例定於六月十二月為期凡各商收買鹽斤  
務先報明捆運數目然後按所驗掣此兩浙歷來  
之蹉規也臣蒙

高厚隆恩併令兼管鹽政惟有事仰遵

聖訓恪守成例不敢違越但偶值勢有阻礙又不得不

隨時變通如本年夏掣臣於六月初先掣杭所卽

於六月中親掣嘉所至六月底商人引鹽已到所

十之五六後因雨澤愆期附場鄉民將河道築壩

蓄水灌田商運引鹽必須盤壩剝淺每鹽一引多

用脚費銀一錢有餘統計各所幾及盈千累萬實

困商力若欲恤商而毀拆民壩則又有妨農業欲

使商民兩全惟有寬期補掣之一法臣查夏掣之  
鹽早已報有成數稍緩時日顆粒難以混淆而各  
商省費實多民得蓄水灌田禾稼竝無傷損誠屬  
兩便之道隨即傳知各商將已經裝運之鹽按數  
悉掣其未曾捆運者暫貯在場另期補掣至紹所  
松所情形大槩相同併飭一體暫停俟得雨疏通  
之日一併補掣臣於七月初一日回署旋即連得  
雨澤於二十六七八等日甘霖大沛田禾無藉蓄

水壩開而鹽船通行臣即飭行鹽驛道飛催各場將六月三十日以前商買之鹽照例悉歸夏掣七月初一日以後商收鹽斤留為冬掣是夏冬兩期應運之引鹽各歸各掣仍劃然不紊今各所將次掣竣統計本年夏掣引鹽現有五十六萬餘引較上年所掣更有溢餘臣因時權宜雖與成例略有變通而實為恤商利民起見不敢拘守固執謹將掣過引數併補掣緣由繕摺奏

聞伏乞

皇上睿鑒謹

奏

引鹽驗掣等務朕實未經留意不便批諭是與非也如有變通成例之處仍應咨明該部

浙江總督臣程元章謹

奏為奏

聞事竊照浙省風俗習尚浮華喜沽名譽其略知文藝

者往往尋章摘句撫拾陳言刊刻成書以邀著述之虛名臣蒙

皇上高厚殊恩委任重寄蒞浙之日即通行所屬嚴加禁飭詎有淳安縣告假回籍宛平縣縣丞吳茂育狂悖無知愍不畏法本年十一月初九日據嚴州府稟稱有淳安縣生員吳零係吳茂育之族兄赴府首告茂育刊刻求志編二本語多狂悖等情并繳原書到臣隨加翻閱其中講學各條類多拾人

唾餘毫無心得而評論古今則語言感慨詞氣不  
平肆口妄談毫無忌憚伏思

聖朝重熙累洽我

皇上德被萬方薄海內外靡不傾心向化茂育生逢

盛世身受

國恩不思感激報効乃敢以無知狂吠刊刻傳播已屬  
喪心而書首李沛霖序文止書癸卯九月不書雍  
正元年更干法紀臣披閱之下不勝髮指隨飭密

拏去後茲據該府將吳茂育拏解前來并於其家  
起獲未釘求志編一部與吳零呈繳之書磨對內  
多自序五頁書有

國朝年號除行按察使劉章嚴審究擬并提吳零質訊  
因何兩書序文互異之處一面查明茂育職銜履  
歷詳革外所有現在拏究緣由竝繳到原書二本  
又未釘一部相應一併恭呈

御覽臣謹繕摺具

奏伏乞

睿鑒施行謹

奏

此奏嘉是覽之宜嚴加審究毋涉疎縱大凡匪類之為害世道生民甚於盜賊何也蓋盜賊確有形迹可憑兼為成例所限該管有司雖欲怠忽而亦勢所不能至於姦匪之徒或托名斯文或藉口著述儘可置之弗問所以除賊猶易而除匪甚難地方大吏每膜外視之皆係

不識輕重欲避勞怨而已豈純臣奉公之居心乎咸似此留心搜訪懲治則若輩自不敢復萌妄念更肆邪說裨益國家造福黔黎實非淺鮮浙省此風向時甚熾自李衛總督以來大半斂跡矣卿當踵而行之以繼其後毋使其故智復萌切不可因遠多事苛求四字之嫌而貽誤於世道生民也果能於斯一節汲汲剷除勝於治理刑名錢穀案件之功不啻什伯相倍卿其謹誌奉行勿替

浙江總督臣程元章謹

奏為陳奏事竊照浙省海塘關係緊要仰蒙

聖恩特允內大臣海望等所奏添設海防兵備道一員  
總理塘工并舊有海防同知一員外復添設一員  
分管東西兩塘以專責成誠屬有裨臣查兵備道  
王斂福前在杭嘉湖道任內年給養廉銀一千六  
百兩因兼辦海塘公務又增給銀一千兩俟工竣  
停其添給今調補兵備道專理仁寧鹽平等縣塘

工往來稽察兼之管轄兵馬政務殷繁用度亦多  
應請照依寧台溫處二道之例每年酌給養廉三  
千兩外加給備公銀四百兩以資費用至杭嘉湖  
道劉復不復兼理塘工似應將續增之一千兩停  
其給發但乍浦新設滿漢船廠經臣

題明委令該道監督料理業經准有部覆則該道督  
辦船工亦有往返奔馳差遣盤費等項若僅給銀  
一千六百兩實有不敷應請仍照舊例年給養廉

銀二千六百兩以足用度再海防同知每年向給  
養廉銀六百兩又留給鹽規銀二百四十兩今添  
設一員自應一例支給養廉其鹽規銀兩不便額  
外增添應令將舊有之數各半分用至該同知等  
專辦塘工事務孔殷非間曹可比應請每年各加  
給備公銀二百兩庶辦公事不致掣肘以上各  
項銀兩均請於餘耗項下動支事關酌給官員養  
廉備公臣未敢擅便理合恭摺

奏明伏乞

皇上睿鑒批示遵行謹

奏

覽

汝辦理海塘工務甚不副朕所望

浙江總督臣程元章謹

奏為恭報晚禾收成分數事竊照浙省晚禾每年俱  
於九十月間始行登場今已收穫臣通行飭查據

杭嘉湖寧紹台金衢嚴溫處等十一府各報所屬  
收成惟新城分水烏程歸安四縣夏秋之間雨澤  
愆期高阜田畝間有一二被旱之處收成不無稍  
歉其餘各州縣俱有十分九分八分七分不等閭  
閻小民靡不含哺鼓腹感戴

皇仁且當刈穫之時天氣晴和春花豆麥均已布種齊  
全十一月初連得甘霖滋潤現在長發而十三十  
四二十一等日又獲瑞雪八九寸及四五寸不等

四野均需來歲春熟豐稔更可預期至杭嘉湖三  
府米價每石一兩二三錢及一兩五六錢不等上  
游寧紹台金衢嚴溫處八府每石八九錢及一兩  
一二錢不等除晚禾收成細數臣另摺分晰恭呈  
御覽外所有浙省雨雪情形暨米糧價值理合一併奏  
聞伏乞

睿鑒謹

奏

浙省晚禾收成分數米糧價值並雨雪情形以手加額  
覽焉

浙江總督臣程元章謹

奏為奏

聞事竊查浙省地廣人稠秀頑不一其間游手好閒之  
輩妄作非為煽惑人心冀生事端不能保其必無  
所以臣到任後隨通飭文武員弁留心稽察先事  
預防毋許疎忽茲據衢州府知府楊景震稟稱率

同署江山縣知縣陳廷訓親往該縣青湖峽口仙霞嶺念八都及閩省浦城交界一帶深邃處所查勘情形訪得江邑念五都民人王益善蹤跡詭秘交結匪類學習拳棒正在查拏間有該犯堂叔王攀雲因見追拏嚴緊懼累呈首前來當即拏獲王益善并起出偽劄一張訊據供係陳明章在詹人文即詹子彬家拏來又周廷鳳亦得偽劄一張等語即委員密拏詹人文陳明章周廷鳳三人到案

據詹人文供稱偽劄係江西玉山縣民吳士榮私造給伊散賣又同祝皆照式翻刻轉給陳明章周廷鳳王益善王昌禹等所刊木板已經銷燬其磚刻印子尚在祝皆家內等情稟報到臣查詹人文等結納匪類謀為不軌私造偽劄輾轉散布事關叛逆且偽劄上寫奉主字樣必有主謀為首之人分給偽劄定不止此數張恐有私藏花名冊籍除一面飛差標員星往該地方并密飭衢州府楊景

震衢協副將葉應龍各委員會同按址協拏吳士榮等追起偽劄刊板究出造意首犯并查餘黨及有無巢穴地方密拏全獲務盡根株嚴審明確律擬招解一面密咨兩江督臣江西撫臣飛飭所屬查拏移解來浙收審竝移咨閩省督撫臣一體嚴查毋使潛匿鄰境外所有查拏匪類緣由相應繕摺奏

聞并將王益善名下起出偽劄一張一并齎呈

御覽伏乞

皇上睿鑒施行謹

奏

覽訪獲匪類情由殊屬可嘉之至封疆大臣能如此留心地方朕復何慮嚴拏各犯徹底追究務盡根株毋存絲毫畏避煩瑣苟簡完結之心倘隣省奉行不力據實摺奏以聞

浙江總督臣程元章謹

奏為陳奏事竊臣前奏淳安縣告假回籍宛平縣縣丞吳茂育狂悖無知私刊求志編一摺奉有

硃批諭旨臣跪讀之下仰見我

皇上明竝日月洞徹姦宄情形實有關於致治之本源

臣荷

聖恩簡任封疆凡地方姦宄邪說無不留心體訪密行查拏嚴加懲治務期姦匪邪說悉除根株俾風俗淳良人心警惕以仰副

聖世一道同風之至治除吳茂育一案現在嚴審從重  
究擬外今欽奉

硃諭理合繕摺

奏覆為此謹

奏

聞邪說以正風俗懲姦匪以警人心能見及此殊屬可  
嘉

浙江總督臣程元章謹

奏為奏

聞事竊照查拏江山縣匪類王益善等交結散劄謀為  
不軌一案經臣將拏獲各犯并追起偽劄緣由兩  
次具摺

奏明茲正月二十二日又據衢州府稟稱訊據吳士  
榮之父吳汝昆供稱伊子十來年前有箇江西省  
城齋堂裏姓傅的叫傅廷兆一箇李子蘭一箇姓  
王不記得名字當年都到玉山地方來算卦兒子

因與他熟識引誘起的或一年去一回或二年去一回那齋堂在撫院衙門近邊前年兒子在齋堂裏拏了兩張劄付回來小的親眼見過給了詹子彬一張祝龍即祝皆一張小的兒子又說封他文陽王是正的那劄付上的主字就是王師父的兒子也在齋堂內不曉得他名字目今小的兒子或逃在那裏去亦未可定等因稟報前來臣細查吳汝昆供情則此案首惡自屬江西之人除又端差

臣標守備龔炳帶同弁兵星飛前往一面密咨江西撫臣添差弁員協同密拏有名各犯務獲撥兵護解來浙究審外相應繕摺奏

聞伏乞

皇上敕下江西撫臣速行一體查拏務盡根株嚴押解浙歸案究擬庶姦匪不致漏網而重案得以速結矣為此謹

奏

已降有嚴旨申飭謝旻矣前諭甚悉竭力遵奉而行

浙江總督臣程元章謹

奏為奏

聞事竊照匪類王益善等交結散劄謀為不軌一案屢據衢州府稟報陸續拏獲各犯追起偽劄併供出為首及夥黨住址多係江西之人經臣節次差標員密咨江西撫臣添差弁員協拏解浙竝三次繕摺

奏明茲正月二十七日又據衢州府稟報續獲夥犯  
鄒英士訊據供係江西撫州府宜黃縣人原同傅  
秀山吳士榮李繼清商謀做的傅秀山即傅廷兆  
是軍師住在江西省城總城隍廟間壁楊家廠地  
方曾對小的說奉的主叫黃森官今年二十來歲  
了就是江西省城齋堂內黃師父的兒子黃師父  
是豐城縣人如今現住在省城那傅秀山還對小  
的說封禁山有好多人在那裏也是扶助這黃森

官的因李子蘭同一箇不知姓名的老生他們曉得黃森官是主情願扶助他的那黃森官實是草頭黃姓不是三畫王姓前說王姓是吳汝昆錯供的紫微星彌勒佛就是黃森官一人前吳士榮於正月十三日半夜到小的家說這事破了拏了一把傘逃往江西省城齋堂同傅秀山商謀去了他們若到省躲不得必往豐城縣黃森官家裏去了黃森官住在豐城縣鄉裏蓮塘地方離縣有三十

里地名叫小岡口傅秀山甥女就是黃森官之妻  
有箇舅子叫胡元龍那齋堂內還有李子蘭父親  
李孔瑞又有貴溪縣人胡海濱都是同夥俱在省  
城等情錄供具稟到臣除臣又差標員星飛前  
往并密咨江西撫臣添差按址協拏有名各犯務  
獲撥兵護解來浙究審并查明封禁山係何縣所  
屬夥黨聚集若干立即設法密拏全獲務盡根株  
外所有續獲匪犯訊供緣由合再繕摺奏

聞伏乞

皇上敕下兩江督臣江西撫臣一并嚴拏解浙歸案究  
審按律定擬庶匪犯不致漏網而地方得以寧謐  
矣為此謹

奏

覽奏知道了已經密諭該督撫遵照矣

浙江總督臣程元章謹

奏為奏

聞事本年正月初四日准吏部咨奉

旨王紘補授安徽巡撫刁承祖調補浙江布政使欽此  
移咨到臣隨卽轉行欽遵去後伏思藩司為通省  
錢糧總匯度支出納關係甚重未便一日乏員辦  
理刁承祖遠在河南且有經手錢糧交代之事一  
時未能即至而王紘係特奉

恩命簡任封疆又難久待臣再四酌量查同城之按察  
使劉章刑名事務繁多勢難兼顧糧儲道朱倫瀚

又值辦漕押運赴淮亦不便委署惟鹽驛道張若震年力富強辦事勤慎堪以就近暫委署理已於本年正月二十日接印任事王紘隨將庫貯錢糧交明於二十九日起身赴皖所有暫委署理藩司印務緣由理合繕摺

奏明伏乞

皇上睿鑒謹

奏

所委甚屬允當

浙江總督臣程元章謹

奏為奏明首犯就獲事竊照江山縣匪類王益善等  
交結散割謀為不軌一案據各犯供稱為首係江  
西省城齋堂內黃師父即黃廷臣之子黃森官經  
臣節次差標員密咨江西撫臣添差協拏解浙  
去後茲二月十七日據守備龔炳稟稱於二月初  
五日已在江西齋堂內拏獲李子蘭李孔瑞并首

犯黃森官之弟黃林官三犯其黃森官父子逃往  
豐城縣現在飛拏等語又於十八日據南昌府知  
府楊毓健稟稱飭委署經歷司郭克恭協同臣標  
差員星夜密往豐城縣查拏隨於初八日據報已  
將黃森官及伊父黃廷臣拏獲并於黃森官家拏  
獲吳易盛等其先獲之黃心寬即黃林官李子蘭  
供出之犯現在嚴拏另稟等情同日又據衢州府  
知府楊景震稟報續獲匪犯張齊雲周德二名并

追起偽劄二張備錄訊過供情具稟到臣除即分飭各該府無分疆界星飛選差按址密拏有名各夥黨務期全獲解歸浙省發覺地方嚴審究擬毋致姦匪稍有漏網外所有為首渠魁已經就獲并續獲夥犯偽劄緣由合再繕摺奏

聞伏乞

皇上睿鑒謹

奏

據奏渠魁已經就獲俟押解到案時遵照前諭嚴審定擬可也

浙江總督臣程元章謹

奏為奏明米糧價值雨水情形仰慰

宸衷事竊查浙省上年各屬田禾仰賴

朕之福全在汝等封疆大吏秉公竭誠有以感召

聖主洪福俱獲豐收惟湖州府屬之歸安烏程二縣夏

和風雨調順庶冀物阜民安化行俗美朕端居九重與

有榮焉若人各潔身自便而不圖維國事惟計一己之

聖明遠燭

天

害而不顧萬民之利必至百務廢弛地方彫敝朕福從

特命將該二縣應完漕糧改徵折色杭嘉二府復蒙截

何而來浙省連歲歉收朕業既薄福何今一旦仰賴洪

福而遂俱獲豐收耶此等虛浮之奏經朕屢次訓飭已

將硃批又概行折徵一半留米既多則價值自平現在浙

東寧紹台金等八府每石米價八九錢至一兩一

非

二錢不等浙西杭嘉湖三府每石一兩一二錢至

天奪其魄而使然乎朕實代汝憂之

一兩三四錢不等較之上年冬間每石已減價三

四錢民食有賴入春以來又幸雨水調勻菜花豆

麥俱各暢茂目下天氣溫和正在育蠶將來豐收

可望緣米糧價值雨水情形關係地方民生均厯  
聖懷理合繕摺奏

聞謹

奏

覽

浙江總督臣程元章謹

奏為陳奏事竊查臣衙門養廉一項經前督臣李衛  
奏留總督一半養廉銀五千兩并舊有鹽政衙門公

費銀四千八百兩以資用度又

奏明每年兩次掣鹽每掣有規費銀二千兩為本身  
公事犒賞等用至

恩賞巡撫每年養廉銀一萬兩存於藩庫抵補從前無  
著虧空迨後虧空已經補足前督臣李衛因用度  
不敷具摺

奏請奉

旨准其動用欽遵在案但臣素甘淡泊諸事儉樸辦事

奴僕不過十餘人每年公事犒賞只須千金上下  
既有總督養廉五千兩鹽政衙門養廉四千八百  
兩再加掣規一項除犒賞外每年約有三千兩共  
計一萬三千兩臣謹身節用已敷辦理三衙門之  
用其巡撫養廉銀一萬兩臣到任以後並未支取  
仍存藩庫以充地方有益公事之用所有臣任內  
動支養廉緣由相應據實

奏明伏祈

皇上睿鑒謹

奏

從前李衛督浙朕尚以為不敷在程元章今日即減至此數朕猶以為過分捫心自問方知母斤斤以潔已為得也若仍執迷不克返省則受恩重者罪亦匪輕將來陷溺既深恐莫之能援矣督撫重任非權巧作用所能負荷惟竭誠格

天抒忠許國此外別無良策詳思而審處之可耳

浙江總督臣程元章謹

奏為欽奉

上諭事本年六月十三日接准大學士鄂爾泰張廷玉  
字寄內開雍正十二年五月二十四日奉

上諭昨據隆昇摺奏海塘引河告竣請定善後事宜數  
條朕已諭令隆昇會同程元章詳悉定議具題請旨  
朕思善後事宜固應設立規條然亦必須該地方官  
實心奉行始有裨益況沿海沿江居民刮沙瀝滴每

不樂於河道之疏通保無有作姦舞弊以圖自便其  
私者此等稽查防範皆地方官之責程元章始初辦  
理此事識見不及今辦理既有成效程元章更當合  
志同心成此捍患禦災之善舉倘稍挾私衷回護一  
己顏面惟願淤塞新開引河以顯已足於地方公事  
不竭力經理以贖前謬以致有司怠玩懈弛奸民因  
而騁志有一於此則程元章之身家性命繫焉爾等  
可作字傳諭程元章知而慎為之欽此遵

旨寄信前來等因到

臣臣

跪讀之下不勝悚惕恐惶愧

悔交并伏念浙省海塘關係重大仰蒙我

皇上睿慮周詳特降

諭旨於中小疊地方開挖引河一道分江流入海以減  
水勢著臣等相度地勢酌量辦理臣隨詳加察勘  
因見地勢東邊微高西邊微低挖至數尺之下即  
係瀾沙恐難成功是以冒昧陳

奏今開挖成河南北兩岸居民靡不歡欣鼓舞感戴

皇仁而沿海竈丁向來刮沙漑漑必用車載肩挑八里

十里之遠始能裝船運竈茲河既通一葦可航往

但思

來裝載鹽漑較為便捷所以此輩人等尤深慶幸

臣潔已不肯致身似此愧悔之事觸處皆然向之所

以自

為者適所以自害無如庸愚輩見不及此其奈之

何然

而猶敢稍存回護惟願引河淤塞以顯已足是視

務則

地方大事於膜外矣臣尚得謂之有人心者乎臣

跪讀

今日之愧悔猶可以當異時之噬臍恐莫能及也

諭旨既感且愧所有善後事宜臣與隆昇詳悉妥議會

題至地方官敢有怠惰不力及奸民從中舞弊者臣  
不時叅拏以儆怠玩而懲刁風務使引河暢流裨  
益塘工以仰副我

皇上慎重海疆軫念生民之至意所有欽奉

上諭緣由理合恭摺覆

奏伏祈

皇上睿鑒謹

奏

覽

浙江總督臣程元章謹

奏為跪讀

訓旨感激覆奏事竊臣陳奏雨水情形米糧價值一摺  
蒙

硃批朕之福全在汝等封疆大吏秉公竭誠有以感召  
天和風雨調順庶糞物阜民安化行俗美朕端居九重與  
有榮焉若人各潔身自便而不圖維國事惟計一已

之害而不顧萬民之利必至百務廢弛地方彫敝朕  
福從何而來浙省連歲歉收朕業既薄福何一旦仰  
賴洪福而遂俱獲豐收耶此等虛浮之奏經朕屢次  
訓飭已將硃批諭旨刊刻頒賜汝等矣程元章獨無  
心目乎莫非

天奪其魄而使然乎朕實代汝憂之欽此臣跪讀  
之下汗流浹背感激悚惶伏念我

皇上訓諭封疆大吏事事務公誠而不務虛文念念在

民生而不在一己乃臣熟聞

聖訓於平日而一時昏瞶錯謬。猶為此無知之妄奏。若

非蒙

天恩指示訓誨。則臣終於愚昧而不自知矣。所有臣跪

讀

訓旨感激微悃。理合恭摺

奏謝

天恩謹

奏

觀汝景况朕所頒賜硃批諭旨總未過目也昏瞶錯謬何至於此

浙江總督臣程元章謹

奏為陳奏事竊臣於六月二十四日偶感時證身發

寒熱時發時愈十有餘日臣雖勉強支持辦事而

醫家謂大汗之後避風數日最為緊要所以適當  
兩次拜本之時臣不得已委中軍副將雷逢春在

大堂跪拜臣在內堂亦復望

闕九叩頭所有臣偶感時疫委官二次代拜本章緣由  
臣不敢不據實陳明謹

奏

將國家公務一如為己之周詳細綴何事不辦何政不  
理耶

浙江總督臣程元章謹

奏為恭報晚禾收成分數事竊照時當冬月正晚稻

刈獲之候行據各府將收成分數開報前來臣查  
嘉興紹興二府所屬俱有十分收成其餘杭州湖  
州寧波台州金華衢州嚴州溫州處州等九府各  
屬俱自七分至十分不等收成各屬自入秋以來  
雨暘時若晚禾秀實俱獲豐收目今天氣晴和春  
花豆麥漸次插種齊全將來豐稔可期各府米價  
自七八錢至一兩二三錢不等居民樂業地方寧  
謐所有田禾收成米糧價值理合恭摺奏

聞伏祈

皇上睿鑒謹

奏

據奏浙省晚禾豐收米價平減欣慰覽焉

總督專管浙江巡撫臣程元章謹

奏為恭謝

天恩事本年十一月十二日接准吏部咨開雍正十二年十月十六日內閣奉

上諭向以浙江吏治營伍俱須整理而浙閩總督駐劄閩省未免隔越是以特授李衛為浙江總督兼管巡撫事務此係因時制宜隨才任使一時變通之政事并未永著為例也今浙江事務經李衛辦理以來已漸整頓而程元章又切以伊之才力難兼總督巡撫鹽政三重任恐致曠誤為辭頃郝玉麟來京陛見朕看其才具精神足以貫注兩省著仍照舊制命郝玉麟為浙閩總督程元章以總督銜專管浙江巡撫并

兩浙鹽政事務等因欽此移咨到臣臣跪讀之下不勝感激涕零伏念臣謏陋庸才蒙我

皇上知遇宏恩畀以全浙重寄兩載以來時切悚惶誠恐緊要封疆稍有曠誤有負

皇上任用之至意是以不揣冒昧據實

奏請另簡賢能赴浙任事容臣趨叩

闕廷朝夕跪聆

聖訓俾獲敬謹遵循力圖報稱今奉

恩旨將總督事務仍照舊制歸於閩省督臣管理  
命臣以總督銜專管巡撫鹽政則責任既分或可竭蹶  
辦理不致隕越聞

命自天感激無地臣惟有殫竭駑駘心力倍加奮勉以  
冀仰報

聖恩高厚於萬一除總督事務現在料理清楚俟福建  
督臣郝玉麟到浙移交辦外所有臣感激愚忱  
理合恭摺

奏謝謹

奏

向日李衛督理浙鹽可謂盡善近聞兩浙鹽務頗不及前似有漸至廢弛光景慎為之虛譽未必能抵實禍偷一時之安致無窮之累當審度之莫忽

總督專管浙江巡撫臣程元章謹

奏為陳奏事竊惟

國家設立鹽政因天地自然之利用以裨益羣生上

裕

國課下資民食其間恤商養竈良法美意無不備至  
惟在司事者調劑得宜斯能行之無弊臣查兩浙  
年額行銷正引七十萬一千六百九十餘道從前  
行引地方半為私梟侵占而松江一所為尤甚以  
致引壅課絀自前督臣李衛兼理以來加意整頓  
禁逐私梟銷清歷年壅引至雍正七年起每年兩  
掣溢銷餘引二三十萬道不等臣接任辦理一切

掣驗運銷事宜仰遵

聖訓恪守成規而於督緝私鹽創懲梟販尤不敢一刻  
懈怠數年以年不獨積販巨梟必按律究擬即零  
星小販亦未嘗少存姑息是以現今兩浙各所引  
鹽俱獲廣銷無滯計臣任內掣數每年俱銷餘鹽  
三十餘萬引溢餘課費等銀二十五六萬兩不等  
年銷年引年清年款商人亦各踴躍急公并無誤  
課較前歷掣有盈無絀此皆仰蒙我

皇上訓示周詳俾臣得以遵循辦理臣斷不敢以現在  
掣數有增稍存怠忽之心惟有倍加整理防微杜  
漸留心督緝務期私梟斂跡官引廣銷以仰副

聖主整飭鹺綱之至意所有臣歷掣遵循辦理緣由理  
合據實繕摺

奏明伏祈

皇上睿鑒謹

奏

鹽務之整飭廢弛人所共知共見顯然有據何在多言  
但李衛之整飭乃出於公忠體國任勞任怨非歸怨於  
上邀譽於下以示不得已於屬員兵民之舉耳鹽務倘  
稍至廢弛不妨更令李衛赴浙督辦自復就緒彼時不  
知程元章何顏立於當世也勤慎為之

總督專管浙江巡撫臣程元章謹

奏為陳奏事竊查兩浙竈地配丁辦課之外海塗漲  
沙廣濶可墾之地甚多祇以外無堵禦潮汐往來

種植無益遂致淪棄水濱今竈丁生齒日繁地未  
加廣各竈謀食維艱煎鹽辦課多有拮据臣思地  
有餘利人有餘力誠能因民之利而利之勸導鼓  
舞築塘以禦潮汐建閘以資蓄洩則塘內沙塗均  
可開成沃土雖竈地科則甚輕於民賦然使窮丁  
衣食有資安心煎鹽辦課實於鹺務更有裨益臣  
先於鳴鶴一場立法勸諭飭令場員趙湘按丁築  
塘按丁分地不許豪強霸占各丁歡欣踴躍爭趨

赴工不一月而告成報墾地一萬四千餘畝臣

具摺

奏明臣又通行各場鼓舞勸導如有此等棄置沙塗飭令一例興築旋據附近鳴鶴之清龍石堰二場竈丁覩此築塘利益咸願接築土塘現在興工舉行其餘各場亦皆聞風踴躍咸願按丁出力計丁分地一體興築惟是土塘之中尚有應建閘座以備蓄洩之處因工費無出羣相籌畫臣思築塘墾

地贍養窮民乃地方有益公務今竈丁既願各出  
已力挑築數百里之土塘已省數萬兩之工費若  
再令其捐建閘座竊恐民力不能仍致觀望推諉  
臣查兩浙衆商公用引費加意撙節每年遞有節  
省餘銀除將臣任內四掣節省銀兩兩次

奏充海塘工費外臣請將第五掣節省餘銀酌撥為  
建閘工料之用庶不費民財而工程易竣臣現在  
飭令該管道府縣場各官并遴委勤幹能員分場

督勸實力舉行如有必需建閘之處確估工料造冊詳請酌給工完核實報銷現今各場竈丁咸知樂利莫不歡欣踴躍感戴

皇仁爭趨挑築容俟工竣之日文明墾田實數同動支建閘銀兩分別造冊送部陞科報銷查明實心任事之員

奏請

恩旨議叙外臣謹將勸築塘堤建閘開墾事宜繕摺陳

奏伏祈

皇上訓示遵行謹

奏

但還朕是當二字何不可之有

總督專管浙江巡撫

臣程元章謹

奏為據實奏覆仰祈

睿鑒事本年四月十六日接准大學士

臣

鄂爾泰張廷

玉字寄內開雍正十三年四月初一日奉

上諭有人密奏浙江仁和縣知縣錢學洙貪婪各款似此不法劣員朕尚聞知程元章身為督撫何以漫無覺察爾等可寄信密問程元章並將各款寄去若其中果有確實之處著即具本嚴叅欽此遵

旨寄信前來并款單一紙到臣臣跪讀之下不勝悚惕伏念臣以庸愚荷蒙

聖恩高厚簡畀封疆重任察吏安民乃係專責況仁邑附郭省會屬在同城尤宜不時留心體察今奉

諭旨詢問著將各款查明其中果有確實之處具本嚴  
參仰見

聖明整肅官方務期核實之至意臣欽遵

諭旨謹按款單逐一細加察查均無實據查錢學洙年  
力強壯辦事尚屬勇往操守亦謹但其為人過於  
剛執不避嫌怨者有之臣荷

聖主知遇隆恩惟矢此一念愚誠冀圖仰報萬一斷不  
敢於屬吏劣蹟稍存徇隱自蹈欺罔之罪臣謹按

原開各款逐一分晰另單呈

覽外所有欽奉

上諭緣由理合繕摺據實

奏覆并將款單恭繳伏祈

皇上睿鑒施行謹

奏

果如是則前奏為不確矣但其中若稍有徇庇屬員回護已失情故則日後領罪不起也當切加訓誡錢學洙

令其勉力奉職特諭

總督專管浙江巡撫

臣程元章謹

奏為恭報春花收成分數事竊照浙省今歲入春以來雨水調勻春花豆麥俱各暢茂時當仲夏刈獲登場行據各府將收成分數開報前來

臣

查惟紹

興府屬收成均有十分其餘杭嘉湖寧台金衢嚴溫處等十府所屬收成九分十分者居十之三八分者居十之五六七分者居十之二而杭嘉湖

三府屬所育蠶絲亦各收成八九分不等當插秧  
之候正值霉雨時行早晚二禾俱已布種齊全現  
在青蔥長發秋成可望各府米糧每石自七八錢  
至一兩一二錢不等價值頗平居民樂業地方寧  
謐所有春花收成米糧價值理合繕摺奏


聞伏祈

皇上睿鑒謹

奏

朕訪聞浙省三郡因春寒蠶絲頗屬不及今乃云八九  
分收成殊與前聞不符是何故也

殊批諭旨卷二百一十一



總校官庶吉士 臣侍 朝

校對官編修 臣馬啟泰

謄錄監生 臣夏清和